

dans la neige, à laquelle estoit attaché vn meschant papier, grifonné avec vn charbon; ils le prennent, le lisent, treuuent ces paroles escrites: Les Hiroquois nous ont pris entrés dedans le bois: Ils entrent dans le bois, treuuent vn gros arbre duquel on auoit fraîchement enleué l'écorce, sur lequel estoient escrits ces mots avec du charbon: Les Hiroquois nous ont pris la nuit, ils ne nous ont fait encor aucun mal, ils nous emmeinent en leur païs; il y auoit quelques autres paroles qu'on ne pût lire. Cecy [141] arriua enuiron le vingtiesme de Fevrier: Ce coup estonna vn peu nos François, qui recommanderent à Dieu avec ferueur, ces deux pauures captifs; on chercha toutes les voyes poffibles pour les déliurer, mais on ne voioit point de iour à cét affaire: Nos Sauuages voisins nous difoient, que c'estoit fait de leur vie, qu'ils auoient esté boüillis & rostis, & mangés; mais Dieu qui se plaist d'exaucer les prieres de ceux qui ont confiance en sa bonté, en dispoit autrement; il nous les a rendus, & nous auons appris ce qui fuit, de leurs bouches.

Nous arriuasmes dans la Bourgade de ceux qui nous ont pris, apres dix-sept ou dix-huict iours de chemin; au bruit de nostre arriée chacun accourt pour nous voir, non feulement les Bourgades voisines, mais encor les autres Nations se vouloient donner ce contentement, de voir des captifs François; on nous faisoit tenir debout à toute heure, pour nous contempler depuis la teste iusques aux pieds: Quelques-vns se mocquoient de nous, d'autres nous menaçoient de nous brusler, d'autres nous portoient compassion; quelques [142] Hiroquois qui auoient esté prisonniers à Kebec, & aux Trois Riuieres, & qui auoiēt